

## **Акафист святой великомученице Варваре**

### **Чтобы не умереть внезапной смертью**

*Святая великомученица Варвара родилась в знатной языческой семье. Ее отец желал выдать девушку замуж, но Варвара решила увести себя единому Жениху – Христу. Ее отдали на мучения, и сам отец лично отрубил мученице голову, за что и был вскоре поражен Божиим наказанием – убит молнией.*

*Святая Варвара имеет благодать у Бога сохранять всякого человека от болезни и внезапной смерти без покаяния и причащения.*

#### **Кондак 1**

Взбранной Богом от идолослужительного рода и призванной во язык свят, в люди обновления, невесте Христове, яко избавляющийся тобою от различных зол и обстояний, благодарственная пения и хваления восписуем ти, молитвенницы твои, святая и всехвальная великомученице: ты же, имущи дерзновение ко Господу, от всяких нас бед свободы, да с радостию зовем ти: радуйся, варваро, невесто Христова прекрасная.

#### **Икос 1**

Ангелом честную и вселюбезную чистоту непорочно сохраниши, честная Варваро, Ангелом сожительница быти сподобилася еси, с нимиже егда поеши Троическую песнь Богу на небеси, услыши нас, поющих тебе на земли похвальная пения сия:

Радуйся, отроковице, Богом Отцем предуставленная быти сообразна в страдании образу Сына Его; радуйся, Сыном Божиим, Светом от Света, призванная из тьмы в чудный свет веры и благодати Его.

Радуйся, яко позвавшему тя Святому Духу, и сама телом и духом свята еси; радуйся, яко от скверны плоти и духа непорочно себе соблюла еси.

Радуйся, рожденному от Девы Жениху Христу девию чистую обручившая; радуйся, земного обручника паче Небеснаго знати не восхотевшая.

Радуйся, крине девства, посреде терния идольскаго прорастший доле; радуйся, цвете чистоты, в неувядаемой славе цветущий горе.

Радуйся, в небесном вертограде Христова благоухания наслаждающаяся; радуйся, краснейшаго паче сынов человеческих зрением тамо утешающаяся.

Радуйся, убелившая ризы твоя в крови Агнчей на земли; радуйся, в лице девственном последующая Божиему Агнцу на небеси.

Радуйся, варваро, невесто Христова прекрасная.

#### **Кондак 2**

Видящи святая Варвара себе на высоком столпе от отца поставлену, помышляше себе манием Божиим к небеси быти возводиму. Разумная убо восхождения в сердце своем положши, теми от тьмы к Свету и от прелестных идолов ко истинному Богу Умне восхождаше, поюще Ему: Аллилуиа.

#### **Икос 2**

Разум неуразумный о едином всея твари Творце разумети дева святая Варвара Ищущи, беседоваше со своим си разумом, глаголющи: «От темных кумиров чудным светилам небесным како бе создатися мощно, рцы ми». К нейже он со Псаломником рече: «Вси бози язык бесове, един же есть Бог и Господь, Иже небеса и вся светила их сотвори». Таковому твоему, мудрая дево, разуму дивящися, глаголем:

Радуйся, паче старец идолослужительных разумнейшая; радуйся, паче мудрецов мира сего мудрейшая.

Радуйся, яко тебе безвестная и тайная премудрости своя Бог явил есть; радуйся, яко тебе истиннаго богословия Сам Бог Слово научил есть.

Радуйся, всех звездочетцев умом Христовым превозшедшая; радуйся, явственнее паче оных небесный круг прозревшая.

Радуйся, яко в твари, Аки в зеркале, самага Творца усмотрела еси; радуйся, яко в созданных светилах Несозданный Свет узрела еси.

Радуйся, ныне уже кроме зеркала свет лица Божия на небеси зрящая; радуйся, тем светом неизреченно веселящаяся.

Радуйся, умная звездо, еяже озарением лице Божие, яко солнце, светло нам является; радуйся, мысленная луно, Еюже ночь заблуждения Яко день просвещается.

Радуйся, варваро, невесто Христова прекрасная.

### **Кондак 3**

Сила Вышняго даде тогда святей Варваре, Якоже древле пророку иезекиилу, лице адамантово, сильно пред всеми идолослужительми, во Еяже не убоитися ей от зверскаго лица их, ни ужасатися лютаго прещения. Темже со дерзновением мужемудренная дева взываше: «троицу чту, едино божество, и Той верою покланяющися, велегласно пою: Аллилуиа».

### **Икос 3**

Имуще святая Варвара свыше данную себе мудрость, востече к делателем бани отеческия, и Онем проявляя тайну Святыя Троицы, повеле три окна в бане устроити. «Аще, – рече, – идолослужителие уста Имут и не глаголют славы истиннаго Бога, то каменные в сей бане стены тремя окнами, Аки тремя устнами, да свидетельствуют, яко Един есть Бог, в Троице святей от всея твари славимый и покланяемый». За таковое Убо мудрование, святая Варваро, приими похвалу сию:

Радуйся, в трекоконной бане купель Святаго Крещения, во имя Троицы Пресвятыя, изобразившая; радуйся, в купели воды и Духа, к сим же и крове твоея мученическия, тебе измывшая.

Радуйся, яко тремя окнами тьму многобожия, троице святей противнаго, прогнала еси; радуйся, яко окнами тремя свет троический ясно узрела еси.

Радуйся, яко теми тремя окнами призре на тя Солнце Правды, тридневно возсиявшее от гроба; радуйся, яко теми тебе возсия день троическаго спасения.

Радуйся, сердце твое Единому в Троице Богу всегда отверсто имевшая; радуйся, чувства твоя пред бранию триех врагов: плоти, мира и диавола, крепко заключившая.

Радуйся, яко в души твоей три мысленныя окна: веры, надежды и любве, устроила еси; радуйся, яко теми тремя окнами при троическом Божестве тремя деньми воздвиженную Тела Христова Церковь усмотрела еси.

Радуйся, яко тебе небеса от триех иерархий ангельских отверзошася; радуйся, яко тебе горния обители троическия радостно прияша.

Радуйся, варваро, невесто Христова прекрасная.

### **Кондак 4**

Буря ярости велия отца твоего, дышущаго прещением и убийством, возшуме на храм души твоя, святая Варваро, но того не возможе поколебати: основан бо бе на твердом веры Христовы камени, на немже ты, мудрая дево, неподвижимо стоящи, укрепляющему тя Иисусу Христу песнь воспевала еси: Аллилуиа.

### **Икос 4**

Услышав от тебе, мудрыя дщери, отец твой диоскор неслышанная о святей троице словеса, Яко Аспид глухий затка уши своя и по подобию змиину с жалом ядоносным устремися со острием меча на твое убийство: но ты, невесто Христова Варваро,

подражаючи Жениха твоего Иисуса, бежавшаго от меча Иродова, бегала еси от меча диоскорова, желаючи сердце его от зверския ярости в любовь отеческую обратити. Мы же разумное твое бегство звании почитаем сими:

Радуйся, блаженная, изгнанная из дому земнаго правды ради; радуйся, богатая в Бога, лишенная отеческих богатств Христа ради.

Радуйся, яко твоего обнищания есть Царствие Небесное; радуйся, яко тебе уготовася вечных благ сокровище.

Радуйся, словесная Агнице, от злаго волка мучителя к доброму Пастырю Христу прибегшая; радуйся, во двор праведных овец Его, одесную стоящих, вшедшая.

Радуйся, незлобивая голубице, от земнаго врана в покров Небеснаго Орла прелетевшая; радуйся, в крове крилу Его добрый себе покров обретшая.

Радуйся, Небеснаго Отца дщи честная, яко от земнаго родителя с безчестием на смерть гонима была еси; радуйся, яко от бессмертнаго Господа Славы в жизнь вечную со славою прията еси.

Радуйся, тояжде и нам жизни присножелающая ходатаице; радуйся, прилежная о нас к Богу молитвеннице.

Радуйся, варваро, невесто Христова прекрасная.

### **Кондак 5**

Боготечной звезде была еси подобна, святая великомученице варваро: бежащи бо пред отцем твоим, наставляла еси того таинственне на путь, ведущий ко Праведному Солнцу, от Девы возсиявшему, Христу Богу. Обаче он душевными ослеплен очима, Абие и телесными не узре тя пред собою бежащую: ты бо сквозе каменную, тебе велением Божиим разступившуюся, гору прошедши, скрылася еси от Очию его в каменной пещере, да от среды камня, Яко птица, даси глас Богу, воспевающи: Аллилуиа.

### **Икос 5**

Видевше тя пастырие, верху горы Овцы пасущии, в камени крыющуюся, дивляхуся, глаголюще: «Что сия словесная Агница? Коего волка бегаеет?» И се диоскор, паче волка лютейший, востече на гору, и тебе тамо крыющуюся обрет, и похитив за девическия твоя власы, влечаше ко своему дому по жестокому пути, на немже ты вернии сретаем приветствии сими:

Радуйся, младому еленю на горах ароматских уподобившаяся; радуйся, горняя паче дольних, восхождения в сердце твоём полагаючи, возлюбившая.

Радуйся, избывшая погибельнаго идолослужения рова; радуйся, на гору троическаго поклонения востекшая.

Радуйся, сквозе камение прошедшая, от каменносердаго бегаючи гонения; радуйся, среде камня Камень Христа, утверждающаго тя, обретшая.

Радуйся, в пещеру каменную вшедшая, видети Иисуса во гробе каменнем бывша положенна; радуйся, уже Того видящая на Престоле Славы сидяща.

Радуйся, яко власы главы твое за Христа хранящаго, да и влас главы человеческия не погибнет, исторжени суть на земли; радуйся, Яко тии от Христа изочтени суть ко увенчанию на небеси.

Радуйся, власы твоя кровию доле, яко цветами, обагрившая; радуйся, заплетение власов твоих окрававленных в венец себе златый обратившая.

Радуйся, варваро, невесто Христова прекрасная.

### **Кондак 6**

Проповедником богоносным, апостолом Христовым, поревновавши, дерзновенно пред лицом мучителей проповедала еси Христа истиннаго Бога: и Его ради лютыя раны, власяными рубы и острым чрепием болезненно потираемая, мужественно претерпела еси,

святая Варваро. Темже в темницу всаждена, в ней Аки в чертозе о Христе Иисусе ликовала еси, поющи Ему: Аллилуиа.

### **Икос 6**

Возсиявый в сердце твоём просвещение истинного богоразумия, возсия и во очесех твоих свет Божественного лица Своего Христос Господь: Той бо, яко возлюбленный твой Жених, в полунощи к тебе, непорочней Своей невесте, в темницу пришед, любезно тя посети, от ран исцели, и светлостью лица Своего неизреченно душу твою возвесели, нас же верных научи пети тебе сицевая:

Радуйся, за страдавшего биение Христа нещадно биенная; радуйся, биения терпением невидимаго врага убившая.

Радуйся, язвы Господа твоего на теле твоём носившая; радуйся, от всех язв темжде Господем на теле твоём исцелевшая.

Радуйся, яко Сам Господь, Свет мира, тебе в темнице бывшей Себе явил есть; радуйся, яко Сам души и тела Врач тебе больную посетил есть.

Радуйся, чрез земную темницу в небесный чертог светло вшедшая; радуйся, от кровей твоих брачную тебе одежду исткавшая.

Радуйся, яко тобою от многих ран грешнии исцеляются; радуйся, яко тобою от всех болезней с верою тя призывающии уздравляются.

Радуйся, уз греховных скорая решительнице; радуйся, язв многозлых добрая целебнице.

Радуйся, варваро, невесто Христова прекрасная.

### **Кондак 7**

Хотящу безумному мучителю желание свое улучшить и еще покушающемуся ласкательными словесы тебе, святая Варваро, от истинного Бога отвратить ко прелестным Идолом, ты, яко мудрая дева, отвечала еси тому: «первее твердый адамант в мягкий воск претвориши, нежели мене отвратиши от Христа Бога моего: Того бо, со Отцем и Святым Духом, единого истинного Бога исповедую, славлю и хвалю, и пою Ему: Аллилуиа».

### **Икос 7**

Новую показа безчеловечия ярость зверообразный мучитель, егда тебе, святая великомученице варваро, повеле на древе повесити, и ногтями железными тело твое строгати, и свечами горящими твоя опаляти ребра, еще же и млатом во главу тяжко бити. Сие пачеестественное терпение твое благоговейно воспоминающе, похвалами блажим тя сими:

Радуйся, яко повешена была еси на древе Христа ради, на Кресте распятого; радуйся, яко строгана по ребром Иисуса ради, копием в ребра прободеннаго.

Радуйся, яко огонь любви к Богу в сердце твоём возжегла еси; радуйся, яко за Того огненными свечами палима была еси.

Радуйся, твердейшая адаманта в терпении невредимом; радуйся, крепчайшая каменнаго столпа в мужестве непоколебимом.

Радуйся, яко млатом, бившим тя по главе, венец царствия тебе исковался; радуйся, яко темже млатом глава врага твоего сокрушился.

Радуйся, яко со Христом, Его ради, на земли страдала еси; радуйся, яко с Ним и о Нем на небеси прославляешия.

Радуйся, всех врагов наших крепкая победительнице; радуйся, во всех бедах наших скорая помощнице.

Радуйся, варваро, невесто Христова прекрасная.

## **Кондак 8**

Странное и страшное святяя Варвары страдание видящи, благоверная в женах иулиания удивися зело, како млада отроковица в Юностнем телеси таковыя мужественно за Христа терпит муки; таже, слезнаго исполнившись умиления, благодарственно и та возопи Христу Богу: Аллилуиа.

## **Икос 8**

Весь Сладчайший Иисусе сладость, весь желание тебе бысть, святая Варваро, сладце бо Его ради горькия претерпела еси муки, глаголющи: «Чашу страданий, Юже даде ми возлюбленный мой Жених, не Имам ли пити?» Темже и сама показала еси чаша, сладость чудесных исцелений изливающая всем вопиющим к тебе сицевая:

Радуйся, отвергшая во адское горе идольскую горесть; радуйся, возлюбившая небесную Иисусову сладость.

Радуйся, мысленная стамно, манну брашна творения воли Божия в себе имущая; радуйся, верных во благих желание исполняющая.

Радуйся, реко, исполненная благодати Божия водами; радуйся, источниче, кипящий чудес излиянии.

Радуйся, яко пчела, от зловоннаго идольских жертв дыма отлетевшая; радуйся, во благоуханную мира Христова воню сладце притекшая.

Радуйся, яко твоими по всем теле Язвами была еси подобна соту; радуйся, яко крове твоея капли сладчайшия паче меда быша Пресладкому Иисусу.

Радуйся, яко всем верным воспоминание твое пресладко; радуйся, яко всей Церкви Христовой имя твое пречестно.

Радуйся, варваро, невесто Христова прекрасная.

## **Кондак 9**

Все естество ангельское велию возрадовася радостию, узревши мужественную крепость твою, святая и непобедимая мученице Варваро: видевше бо Ангельстии чинове ветхаго врага, прегордаго князя тьмы, со всем его бесовским и диавольским полчищем от тебе, единыя младыя девы посрамленнаго, побежденнаго же и под нозе твои поверженнаго, велиим гласом возопиша Богу: Аллилуиа.

## **Икос 9**

Ветии многовещаннии риторскими своими языки не возмогут изрещи величества твоих болезненных страданий, о Варваро: кто бо скажет болезнь твою, колика бе, егда сосца твоя урезана быша? Кто изречет студ лица девического, егда обнажена по всему граду от беззаконных мучителей водима была еси? Сицевую болезнь и безчестие твое мы точию воспомянувшю, содрогаемься и со умилением глаголем сице:

Радуйся, добрая леторасле сада Иисусова; радуйся, истинная лозо винограда Христова.

Радуйся, два сосца твоя отрезанная, Аки два грезна в честь господеву твоему принесшая; радуйся, кровь твою, Аки вино умиления, от тех источившая.

Радуйся, яко Христа ради обнаженнаго и ты риз своих совлечена была еси; радуйся, яко Его ради, во Иерусалиме ругательне водимаго, и ты по граду на поругание водима была еси.

Радуйся, от Ангела светлою одеждою в наготе своей одеянная; радуйся, тою от студных очес невидимо покровенная.

Радуйся, чудным ангелом и человеком позор бывшая; радуйся, и самех мучителей терпением твоим удивившая.

Радуйся, яко Сам Господь свыше призре на твоя страдания; радуйся, Сам Той подвигоположник похвали подвиги твоя.

Радуйся, варваро, невесто Христова прекрасная.

## **Кондак 10**

Спаси хотя душу твою, о теле нерадила еси, святая Варваро: егда бо на тя мечное на смерть осуждение изыде, ты под меч острый, Аки под венец красный радостно идуши, Богу, в мученическом подвизе тебе укрепляющему, воспевала еси песнь: Аллилуиа.

## **Икос 10**

Стены каменные твердее окамененный сердцем бысть диоскор, твой, святая Варваро, не уже родитель, но лютый мучитель: той бо, яко услыша твое мечное на смерть осуждение, не точию о смерти твоей не поболе, но и сам своим мечем на месте осуждения твою святую усече главу, и тако, по предречению Господню, окаянный отец предаде на смерть свое чадо. В той убо блаженной твоей кончине прими от нас пения сия:

Радуйся, за главу Церкви – Христа под меч главу твою преклоньшая; радуйся, за любовь к Небесному человеколюбивому Отцу Безсмертному на смерть от земного безчеловечного отца тленнаго преданная.

Радуйся, течение мученическаго пути скончавшая добре; радуйся, веру безсмертному обручнику Христу до смерти сохраняющая бодре.

Радуйся, силою свыше на брань противу сил преисподних препоясанная; радуйся, победоносною славою в вышних от Христа Победителя одеянная.

Радуйся, оружием благоволения Божия венчанная на земли; радуйся, цветом нетления украшенная на небеси.

Радуйся, девам доброто и похваление; радуйся, мучеником красото и радование.

Радуйся, христианом крепкое прибежище; радуйся, верным твердое заступление.

Радуйся, варваро, невесто Христова прекрасная.

## **Кондак 11**

Пение наше похвальное, Аще бо и тьмочисленное, вемы, яко несть довольно по достоянию восхвалити тя, святая и всехвальная мученице Варваро: обаче мы, Божиих тобою нам обильно подаваемых дарований благодарни суще, Богу в тебе Своими благодеянии прославляемому, благодарственными усты поем: Аллилуиа.

## **Икос 11**

Светоприемную свещу, на небеснем свещнице пред Престолом святяга Трицы поставленную, зрим Умными очима тебе, святая дево варваро: отонудуже, егда ношный грехов наших мрак лучами молитв твоих просвещаеши и нас на светлую спасения стезю наставляеши, по долгу достойна еси от нас званием быти почитаема сим:

Радуйся, светоумная луче, во светлость немерцающую прилученная; радуйся, мысленная деннице, день невечерний озаряти возшедшая.

Радуйся, благовонная смирно, Церковь Христову благоухающая; радуйся, золотая кадильнице, фимиам молитвы о нас к Богу приносящая.

Радуйся, мироположнице исцелений неоскудная; радуйся, сокровище Божиих даров неизживительное.

Радуйся, чаше, от обилия дому Божия черплющая радость; радуйся, сосуде, от исполнения Христова приемлющий всех благ небесных сладость.

Радуйся, адаманте, перстень безсмертнаго со Христом обручения красивый; радуйся, венче доброты, в руке Господней держимый.

Радуйся, яко на тя Царь славы, Господь сил, славу и велелепие возложил есть; радуйся, яко тебе Царь царствующих и Господь господствующих Царство Свое и господствие даровал есть.

Радуйся, варваро, невесто Христова прекрасная.

## **Кондак 12**

Благодать от Бога дана ти есть, хранить и соблюдать от внезапных болезни и наглыя смерти всякаго человека, верою, любовию и благоговением честная твоя страдания воспоминающаго и почитающаго; тоя благодати не лиши и нас, добрая дево Варваро, да и мы, здрави сущи телом и духом, в нынешней и будущей жизни о тебе поем Богу: Аллилуиа.

## **Икос 12**

Поем твоя крепкия подвиги, почитаем страдания, хвалим долготерпение, ублажаем святую твою кончину; славим твое в немощном теле оказавшееся непобедимое мужество, Имже на земли и на Небеси прославилася еси, святая и добропобедная великомученице Варваро, и в честь твоих победоносных подвигов и страданий похвальная восписуем ти сия:

Радуйся, от ангельских чинов в сожительство их любезно приятая; радуйся, от девственных ликов в чертог небесный радостно введенная.

Радуйся, от мученических полков под венец славы провождаемая во гласе радования; радуйся, от всех жителей небесных приемшая о Господе целование.

Радуйся, яко мзда твоя многа есть на небесех; радуйся, яко радость твоя вечна есть во светлости святых.

Радуйся, от враг видимых и невидимых крепкая нам заступнице; радуйся, радости нам, благодати же и славы вечныя ходатаице.

Радуйся, душевных и телесных недугов наших целительнице; радуйся, спасительных благ земных и небесных подательнице.

Радуйся, яко тобою от нечаянныя и вечныя смерти сохранени быти уповаем; радуйся, яко тобою вечную жизнь уллучити благонадежно чаем.

Радуйся, варваро, невесто Христова прекрасная.

## **Кондак 13**

О многострадальная и всехвальная святая великомученице варваро! Нынешнее наше моление приемши, от всяких болезней душевных и телесных и враг видимых и невидимых нас избави, и от вечнаго мучения твоим богоприятным ходатайством сохрани, да с тобою на земли живых во веки поем Богу: Аллилуиа.

*Этот кондак читается трижды, затем 1-й икос «Ангелом честную...» и 1-й кондак «избранной Богом...».*

## **Молитва**

О святая славная и всехвальная великомученице варваро! Собранныи днесь в храме твоём Божественнем люди, раце мощей твоих поклоняющиися и с любовию целующии, страдания же твоя мученическая, и в них Самаго страстоположника Христа, давшаго тебе не точию еже в Него веровати, но и еже по Нем страдати, похвалами ублажающе, молим тя, известная желания нашего ходатаице: моли с нами и о нас умоляемаго от Своего благоутробия Бога, да милостивно услышит нас, просящих Его благостыню, и не оставит от нас вся ко спасению и житию нужная прошения, и дарует христианскую кончину животу нашему безболезненну, непостыдну, мирну, Божественных Таин причастну, и всем на всяком месте, во всякой скорби и обстоянии требующим Его человеколюбия и помощи, великую Свою подаст милость, да благодатию Божиею и твоим теплым предстательством, душею и телом всегда здрави пребывающе, славим дивнаго во святых Своих Бога израилева, не удаляющаго помощи своея от нас всегда, ныне и присно и во веки веков. Аминь.